

**REGIONAL NEWS UNIT
ALL INDIA RADIO, AGARTALA
Date: 06-04-2024
Time: 07.35-07.40 AM Hrs
BENGALI MORNING BULLETIN**

CEO Visit to North & Unokoti:

রাজ্যের মুখ্য নির্বাচন আধিকারীক পুনীত আগরওয়াল নির্বাচনের যাবতীয় ব্যবস্থা খতিয়ে দেখতে আজ উনকোটি জেলা ও উত্তর ত্রিপুরা জেলা পরিদর্শন করবেন। রাজ্যের অতিরিক্ত মুখ্যনির্বাচন আধিকারীক উষাজেন মগ এই সংবাদ জানিয়ে বলেছেন, মুখ্য নির্বাচন আধিকারীক আজ উনকোটি জেলা সদর কৈলাসহর ও উত্তর জেলা সদর ধর্মনগরে নির্বাচনের আর ও / এ আর ও, পুলিশ সুপার, ও সংশ্লিষ্ট কর্মকর্তাদের নিয়ে পর্যালোচনা বৈঠক করবেন। আইন শৃঙ্খলা পরিস্থিতিও খতিয়ে দেখা হবে বলে তিনি জানান। মুখ্য নির্বাচন আধিকারীকের সঙ্গে নির্বাচনে পুলিশের নোডাল অফিসারও উপস্থিত থাকবেন।

Returning officer statement :

লোকসভার পশ্চিম আসনের নির্বাচনী আধিকারিক ডাক্তার বিশাল কুমার গতকাল জেলা শাসক অফিসে সাংবাদিকদের জানিয়েছেন, রামনগর বিধানসভা কেন্দ্রের ভোটগ্রহন কেন্দ্রগুলিতে দুটি করে ইভিএম মেশিন থাকবে। দুটি মেশিনেই ভোট দেবেন ভোটাররা। একইসঙ্গে লোকসভার পশ্চিম আসন এবং রামনগর বিধানসভার উপনির্বাচনের ভোট নেওয়া হবে। শ্রী কুমার আরও জানান, ভোটারদের সব ধরনের সাহায্যের জন্য হেল্প লাইন নম্বর থাকবে।

তিনি পশ্চিম আসনে ভোট নিয়ে বলেন, স্পর্শকাতর ভোট গ্রহন কেন্দ্রগুলি চিহ্নিত করা হয়েছে। এই সব কেন্দ্রে পর্যাপ্ত পরিমাণে কেন্দ্রীয় বাহিনী থাকবে। শান্তিপূর্ণভাবে নির্বাচন করাতে ভোটারদের ভোটগ্রহন কেন্দ্রে যেতে যাতে কোনওধরনের অসুবিধায় না পড়েন তার জন্য নিরাপত্তার ব্যবস্থা থাকবে। শ্রী কুমার জানান, যে কোনও ধরনের অনিয়মের খবর এলে তা পাঁচ থেকে দশমিনিটের মধ্যেই সমাধান করার ব্যবস্থা হবে। ভোটগ্রহন কেন্দ্রের বাইরে নিরাপত্তার জন্য সিসিটিভি রাখা হবেও বলেও তিনি জানান। আগামী ১৯ এপ্রিল লোকসভায় পশ্চিম আসনে এবং রামনগর বিধানসভার উপনির্বাচনের ভোটগ্রহন হবে।

Observer :

লোকসভায় পূর্ব ত্রিপুরা আসনের জন্য এসেছেন আরো চারজন পর্যবেক্ষক। এর মধ্যে দুজন হলেন সাধারণ পর্যবেক্ষক এবং দুজন পুলিশ পর্যবেক্ষক। নির্বাচন দপ্তর সূত্রের খবর, সাধারণ পর্যবেক্ষকরা হলেন ভাস্কর কাটামমেনি এবং শচীন্দ্র প্রতাপ সিং। পুলিশ পর্যবেক্ষকরা হলেন ভূষণ গোলাবারা এবং ডাক্তার এনি বিজয়া। এছাড়া পশ্চিম ত্রিপুরা লোকসভা কেন্দ্রের জন্য পাঁচজন পর্যবেক্ষক রাজ্যে ইতিমধ্যে এসে গেছেন। লোকসভা নির্বাচনকে কেন্দ্র করে রাজ্যে এখনো পর্যন্ত দশজন পর্যবেক্ষক এসেছেন।

Vice president Dhankhar :

উপরাষ্ট্রপতি জগদীপ ধনখর গতকাল উত্তরাখণ্ডের মুসৌরিতে লাল বাহাদুর শাস্ত্রী ন্যাশনাল অ্যাকাডেমি অফ অ্যাডমিনিস্ট্রেশনে

২০২৩ ব্যাচের আইএএস অফিসারদের প্রশিক্ষণের সমাপ্তি অনুষ্ঠানে উপস্থিত ছিলেন। তিনি ভাষণে প্রশিক্ষণার্থীদের সর্বোত্তমতা, সততা ও জনসেবার প্রতি অঙ্গীকারবদ্ধ হওয়ার আহবান করেন।

Biplab kumar Deb prachar :

লোকসভায় পশ্চিম আসনে বিজেপি প্রার্থী বিপ্লব কুমার দেব গতকাল সন্ধ্যায় ৬ আগরতলা বিধানসভা কেন্দ্রের চন্দ্রপুরে নির্বাচনী জনসভায় অংশ গ্রহন করেন। উপস্থিত ছিলেন বিজেপি নেত্রি পাপিয়া দত্ত, নিতাই চৌধুরী সহ অন্যরা। শ্রী দেব ভাষণে লোকসভায় রাজ্যের দুটি আসনে বিজেপি প্রার্থীর জন্য ভোট চেয়েছেন।

BJP prachar, Ratan lal Nath :

মোহনপুরে গজারিয়া গ্রামে গতকাল নির্বাচনী বুথ কার্যালয়ের উদ্বোধন করেছেন বিজেপি নেতা তথা বিদ্যুৎ মন্ত্রী রতনলাল নাথ। এর আগে তিনি লেফুঙ্গা বাজারে বিজেপি, তিপরা মথা এবং আইপিএফটির যৌথ নির্বাচনী কার্যালয়ের উদ্বোধন করেছেন।

Deepak Majumder , prachar :

রামনগর বিধানসভা কেন্দ্রের উপনির্বাচনের প্রচারে বিজেপি প্রার্থী তথা আগরতলা পুর নিগমের মেয়র দীপক মজুমদার গতকাল রাতে আগরতলার ১৪ নম্বর ওয়ার্ডে এক সভায় ভাষণ পেশ

করেন। উপস্থিত ছিলেন বিজেপি নেত্রী তথা কর্পোরেটর স্নিগ্ধা দেব। গতকাল রাতেই রামনগর বিধানসভার ১৩ নম্বর বুথে নির্বাচনী কার্যালয়ের উদ্বোধন করেন মেয়র শ্রী মজুমদার।

Governor visit at DDSC :

রাজ্যপাল ইন্দ্রসেনা রেড্ডি নাল্লু বাধারঘাটে দশরথ দেব স্পোর্টস কমপ্লেক্সের সুযোগ সুবিধা কাজে লাগাতে খেলোয়াড়দের আহ্বান করেছেন। গতকাল সন্ধ্যায় তিনি স্পোর্টস কমপ্লেক্সটি পরিদর্শন করেন। তিনি ট্র্যাক অ্যান্ড ফিল্ড গ্রাউন্ড, হকি মাঠ, টেনিস সেন্টার, হ্যান্ডবল কোর্ট , রাইমা সুইমিং পুল, ইনডোর জিমনাসিয়াম ঘুরে দেখেন। পরিদর্শনকালে রাজ্যপাল কোচ , স্পোর্টস স্কুলের আধিকারিক এবং খেলোয়াড় ছাত্রছাত্রীদের সঙ্গে কথা বলেন। উপস্থিত ছিলেন ক্রীড়া দপ্তরের অধিকর্তা এসবি নাথ সহ অন্যান্যরা।

Senior Cricket :

ত্রিপুরা ক্রিকেট এসোসিয়েশন পরিচালিত মহিলা ক্রিকেটরদের ৫০ ওভারের আসরে আজ দুটি ম্যাচ অনুষ্ঠিত হবে। মোহনপুরের তালতলা স্কুল মাঠে লালবাহাদুর খেলবে মৌচাক ক্লাবের বিরুদ্ধে। অন্যদিকে মেলাঘরের শহীদ কাজল ময়দানে এ ডি নগর লড়াই করবে এগিয়ে চলো সংঘের বিরুদ্ধে।

T20 Cricket :

টিসিএ পরিচালিত সমীরণ চক্রবর্তী স্মৃতি ঘরোয়া টি-২০ ক্রিকেট প্রতিযোগিতায় গতকাল পাঁচটি খেলা অনুষ্ঠিত হয়। নরসিংগড়ের টিআইটি মাঠে অনুষ্ঠিত দুটি খেলায় চলমান সংঘ ৭ উইকেটে শতদল সংঘকে এবং স্ফুলিঙ্গ ক্লাব ৮৩ রানে হার্ভে ক্লাবকে হারিয়ে দেয়। নরসিংগড়ের পিটিএ মাঠে অনুষ্ঠিত দুটি খেলায় জয়নগর ক্রিকেট ক্লাব ৮ উইকেটে বনমালীপুর ক্রিকেট ক্লাবকে এবং ইউনাইটেড ফ্রেন্ডস ১২৭ রানে মৌচাক ক্লাবকে হারিয়ে দেয়। এদিকে, এম বি বি স্টেডিয়ামে অপর খেলায় সংহতি ক্লাব ৯ রানে কসমোপলিটান ক্লাবকে পরাজিত করে।

Weather :

আগামী চব্বিশ ঘণ্টায় রাজ্যের পশ্চিম জেলা, সিপাহীজলা এবং খোয়াই জেলায় বিক্ষিপ্তভাবে বজ্রবিদ্যুৎ সহ বৃষ্টি সঙ্গে ঘণ্টায় চল্লিশ থেকে পঞ্চাশ কিলোমিটার বেগে ঝড়ো হাওয়া বয়ে যাওয়ার সতর্কতা জারি করেছে আবহাওয়া দপ্তর। বাকি সব জেলায় বিক্ষিপ্তভাবে বজ্রবিদ্যুৎ সহ বৃষ্টিপাতের সতর্কতা জারি করা হয়েছে। আজ আকাশ সাধারণত মেঘাচ্ছন্ন থাকবে। সর্বনিম্ন তাপমাত্রা ছিল ২৬.৫ ডিগ্রী সেলসিয়াস । আজ দিনের সর্বোচ্চ তাপমাত্রা ৩৫ ডিগ্রীর কাছাকাছি থাকতে পারে।
